

恪靖奏稿續編卷六十三目錄

攻拔古牧地克復烏魯木齊迪化州戰狀摺

李雲麟請 予恩施片

請 飭部查催協餉摺

攻拔古牧地克復烏魯木齊迪化州戰狀摺

奏爲詳陳官軍攻拔古牧地堅巢克復烏魯木齊迪化
州等城戰狀分別請獎以勵軍心並籌布置情形恭摺
仰祈

聖鑒事竊官軍會師進剿攻拔黃田賊棚古牧地堅巢
克復烏魯木齊迪化州各城大概情形臣已於七月十
八日專摺馳陳茲據總理行營營務三品卿銜布政使
銜西甯道法福凌阿巴圖魯劉錦棠續報六月二十四
日攻拔古牧地關壘並擊敗援賊大捷之後金順劉錦

棠策馬巡視知古牧地城賊守備甚嚴金順遂飭所部
環城正西西北西南三面結壘劉錦棠環城之正北東
北正東東南正南等面結壘抽派營勇於南城外晝夜
修築礮台以高過城身一丈爲度其各面原有礮台均
令培土鋪板以便安礮迨礮台告成布置就緒金順督
所部攻西北一帶並分開花銅礮一尊置湘軍礮台二
十六日劉錦棠飭甯夏鎮總兵譚拔萃率千總莊偉以
開花大礮轟塌東北面城垛復用開花銅礮並劈山礮
緊對缺口連轟之二十七日移開花大礮斜轟城之正

東其轟塌缺口與東北相似復以開花小礮及劈山礮環攻不歇城內賊眾踞守益堅二鼓後劉錦棠傳集將領商定策畧飭譚拔萃督同提督席大成副將湯仁和率左軍三營由東北缺口進攻漢中鎮總兵譚上連督同提督蕭元亨戴宏勝率右軍三營由正東缺口進攻均各留隊以遏賊竄知府羅長祐督同副將楊金龍及莊偉率親兵移開花大礮於正南礮台伺天色嚮明指轟南門左側並調集標針快響鎗七響洋鎗劈山礮排列礮台左右同時轟擊提督譚慎典譚和義率中軍左

四旗參將董福祥副將張俊率董字兩營各飭勇丁囊土潛伏塙壕俟大礮轟有缺口卽行政入直隸州知州袁珪齡提督唐國華湯秀齋率中軍右三旗列隊南城左右以備策應並遏賊出竄之路陝安鎮總兵余虎恩督同總兵陶鼎金率馬隊兩營提督黃萬鵬督同千總崔偉畢大才禹中海守備禹益長馬正國率馬隊五旗提督陶生林率馬隊一營分布正南一帶山岡提督張春發陳廣發率步隊兩營分布西南一帶平川俟城賊出竄截擊布置已定劉錦棠自率老馬隊於城南山壘

憑高督陣二十八日黎明開花大礮轟動南城左側子
牆漸圯大礮測準連轟城身坍塌過半城頭悍賊潛伏
城隈仰施鎗礮官軍標針快響鎗七響鎗劈山礮連發
子注如雨賊多死者城南壘中號鼓齊發南路攻城隊
伍飛奔齊進賊猶以鎗礮憑牆抵放官軍旣上缺口各
以火包向賊紛擲後隊復囊土填壕一擁而入將施放
鎗礮拒賊悉數斬殺城中悍賊分扼巷口死拒譚慎典
譚和義張俊董福祥等各督隊短兵相接斬馘甚眾時
譚拔萃均已入城金順所部又由東北面併進合擊巷

戰之賊斫殺殆盡其由缺口逸出者均經預派各馬步
截殺無一漏網陝回頭目馬十娃爲禹中海素識擒而
斬之其餘所斬賊目則不知誰何也劉錦棠見城賊已
淨始飭所部收隊還營計是役擊斃殺斃焚斃悍賊不
止五六千人生擒二百十五人拔出難民婦女幼孩甚
眾奪獲賊馬二百餘匹鎗礮旗幟刀矛無數劉錦棠所
部陣亡員弁勇丁一百五十八員名受傷四百五十五
員名據擒賊供回酋王智卽王治及金中萬均經官兵
殲斃其安集延派援兩賊目一綳塞奇一玉只把什共

帶夷兵三百五十八人已於二十四日盡殲其城內夷兵除生擒外亦均於是日盡矣白逆彥虎本踞紅廟子時往來卡子溝未曾入城故得倖免此二十八日會師攻拔古牧地堅巢首要各逆擒斬淨盡之實在情形也劉錦棠入城察看尚存火藥硝磺數千斤拾回漢文各一通關係王治金中萬等被困求救於烏城逆首阿奇木者其批回言烏城精壯已悉數遣來現在三城防守乏人南疆之兵不能速至爾等可守則守否則退回烏城併力固守亦可阿奇木係怕夏派甘回馬人得所充

之似官管轄古牧地烏垣紅廟瑪納斯及僞王城回兵
者所稱三城蓋指烏魯木齊迪化州及已死僞清真王
妥得璘所築之王城所稱南疆則指安集延而言也劉
錦棠以烏垣空虛當乘勝急攻遂一面知會金順一面
派弁偵探旋據報稱卡子溝兩賊壘已空距卡子溝二
十里之七道灣有賊竄走劉錦棠卽飭譚和義唐國華
兩營留守古牧地城餘隊均於二十九日黎明親督進
烏垣金順亦督所部繼進行近七道灣堡馬隊回報堡
外尙有餘賊見官軍至飛騎而竄馬隊躡追斃賊十餘

名劉錦棠卽留董福祥步隊一營守堡餘隊悉拔前進
行近烏城十里地方探報三城騎賊紛竄遂催馬步急
進甫抵迪化州城北見竄賊千餘已出城里許向南奔
逸劉錦棠立飭余虎恩陶生林陶鼎金率馬隊三營由
左路追擊譚拔萃席大成張春發湯仁和率步隊四營
繼之黃萬鵬崔偉畢大才禹益長馬正國禹中海率馬
隊五旗由右路追擊譚上連蕭元亨戴宏勝陳廣發率
步隊四營繼之譚慎典湯秀齋張俊率步隊三營由北
城衝入劉錦棠率羅長祐袁世齡及老馬隊親兵列隊

城北旋據入城各營飛報城中悍賊百餘人悉經斬殺
生擒賊十三名此外未持械者悉釋勿誅劉錦棠復分
隊入僞王城及烏魯木齊合金順所部將未竄零賊盡
殺無遺據擒賊供二十四日古牧地關壘克復援賊敗
退賊首馬人得與白彥虎等聚議以官軍銳不可當莫
如先遣婦女輜重南竄留精壯駐守再候消息嗣見官
軍大至遂相率逃奔訊畢斬之適追賊馬步各營收隊
入城據稱分追至十餘里地方賊回頭拚拒馬隊合力
猛擊斬殺甚多陶鼎金腮受矛傷裹創與余虎恩黃萬

鵬等急麾馬隊追殺至城南三十里之鹽池墩因踰此而南卽係戈壁未便深追時譚拔萃譚上連率步隊繼至遂與收隊而還是役斃賊約五六百名生擒二十六名劉錦棠所部陣亡員弁勇丁一百三十員名受傷四十七員名奪獲戰馬七十餘匹拔出城中難民老幼婦女及避匿山谷者均設法安撫派營務處委員直隸州知州袁堯齡經理其事一面商由金順暫委該員代理迪化州篆務以專責成烏城克復劉錦棠連派哨探擒獲零賊僉稱昌吉呼圖壁瑪納斯等城踞逆先後向南

竄逸安集延酋怕夏遣來援賊四五千騎聞已至距烏城一百八十里之大板地方劉錦棠擬派隊迎擊旋詢知援賊已退遂止此二十九日會師連克烏魯木齊迪化州等城追擊竄賊之詳細情形也現在新疆北路一律肅清臣擬商金順錫綸布置各城堡要隘一面商辦善後事宜一面咨調張曜徐占彪會同劉錦棠進規南路并增派馬步各營及鎗隊礮隊赴前敵助剿一俟布置妥畢再行馳報竊維烏魯木齊各城自同治三年逆回妥明即妥得璘肇亂戕都統提督竊踞其中逾二年

自稱爲清真王逆黨馬泰馬仲馬明馬官各署僞號分
踞古牧地吐魯番瑪納斯等城又六年妥明噶黨與安
集延戰於庫車爲安集延所敗安集延旋赴吐魯番糾
妥明之黨馬仲併攻妥明妥明乞降仍令爲清真王踞
守烏城別以馬仲爲阿奇木總管各事嗣徐學功帶隊
進剿陣斬馬仲其子襲阿奇木僞職與妥明積不相能
復糾安集延酋攻妥明妥明旣斃馬明馬官等悉降自
是安集延遂於此征收地稅令回漢雜髮易服效其舊
俗皆光頂圓領以自別而烏垣各城遂淪爲異域矣安

集延酋怕夏兩次與逆回博鬪降妥明等盡掠其遺資搜括漢回民人金帛轉輸南路實其窟穴而驅其丁壯踞守烏垣各城以爲屏蔽追陝逆白彥虎糾陝甘悍回竄至自知勢力不敵安集延思藉爲聲援以自固凡怕夏所欲不敢違也故怕夏日富而土回日益貧比聞大軍由巴里坤古城浩蕩而來白逆亦薙髮易服竊附於安集延其給死黨與土回堅拒官軍自觀成敗伺閒脫走則又此賊之慣技也此次兵由北路而進一在扼其紛竄以省防兵一在下兵南路防其牽綴而由關內出